



**Komunikadu Imprensa**  
**07 Novembru 2024**

**Partisipantes fetu formasaun “lideransa transformativa”  
RAEOA husu JSMP organiza formasaun ba líder partidu  
polítiku sira no presiza halo regularmente**

Partisipantes fetu iha formasaun “lideransa transformativa” iha RAEOA husu JSMP atu organiza formasaun ba líder partidu polítiku sira no rekomenda atu organiza formasaun hanesan ne’e regularmente. Pedidu no ezijénsia ne’e apresenta iha sesaun formasaun ne’ebé realiza iha 5 Novembru 2024, iha RAEOA.

“JSMP komprometidu atu kontinua promove atividade formasaun no sensibilizaun sira hodi permite partisipasaun luan no ativu sidadaun hotu, partikularmente organizaun fetu sira iha setór oioin, inklui kuadru partidu polítiku sira no lideransa organizaun sosiedade sivil ne’ebé dalabarak la iha oportunidade atu espresa no manifesta sira ninia hanoin no explora sira ninia potencialidade atu kontribui ba prosesu dezenvolvimentu nasional”, dehan Sr. Casimiro dos Santos, Diretór Ezekutivu Interinu JSMP.

Atividade ne’e realiza ho kolaborasaun, parseria no apoiu finanseiru hosi Gabinete Apoiu Sosiedade Sivil (GASC), iha Gabinete Vise Primeiru Ministru, Governu Konstitusionál IX.

Formasaun ne’e dezeña ho objetivu:

- 1). Atu kontribui ba hasa’e nível koñesimentu no kapasidade fetu potenciál sira kona-ba lideransa transformativa iha setór hothotu, partikularmente iha setór polítiku-lejizlativa no mós jestaun nian;
- 2). Atu promove partisipasaun ativu fetu iha nivel hothotu no reprezentasun ida ho qualidade; no
- 3). Asegura katak bainhira iha oportunidade atu konkorre kargu públiku sira bele dezempeña no ezerse knaar ka funsaun sira ho profesionál, integridade no mós ho koñesimentu adekua no produtivu.

Iha sesaun abertura, Adjunta-Koordenadora Gabinete Apoiu Sosiedade Sivil, Sra. Yasinta Lujina, afirma katak Governu Konstitusionál IX konsidera sosiedade sivil nu’udar parseiru estratéjiku governu nian durante tinan barak no governu atuál komprometidu atu kontinua apoiu sosiedade sivil ne’ebé serbisu ho orintasaun klaru ba mudansa sosiál.

Tanba ne’e nia enkoraja partisipante sira atu aproveita oportunidade ne’e hodi eleva kapasidade no koñesimentu, nune’e bele iha interesse atu partisipa no asume responsabilidade bainhira estadu depozita konfiansa ba fetu sira iha futuro.

Materia formasaun ne'e foku ba lideransa transformativa ne'ebé diskuti no explora tema relevante sira hanesan; konseitu lideransa transformativu ne'ebé hahú hakle'an ho saida mak lideransa, lideransa tuir péritu sira ninia hanoin/hanorin, diferensa entre líder, jestór, xefe no patraun ka boss, tipu lideransa, qualidade lideransa ne'ebé intregra valór sira kona-ba integridade, onestidade, responsabilidade (akontabilidade), anti-korrupsaun ne'ebé nu'udar elementu xave iha konseitu lideransa iha era atuál. Matéria sira ne'e hotu elabora iha manuál ne'ebé distribui ba partisipante sira no finánsia hosi fundu GASC.

Durante sesaun diskusaun, partisipante sira espresa sira ninia laran haksolok tanba bele iha espasu no oportunidade hodi aprende kona-ba kestaun lideransa ho ninia konseitu no valór asosiadu sira ne'ebé líder sira merese tenke iha atu bele sai líder ida di'ak no ideál, atu-nune'e bele ajusta-an no korresponde ho kompleksidade no dezafiu mundu atuál.

Depois observa matéria hirak ne'e no avalia komportamentu lideransa sira ohin loron nian, tantu iha partidu ida-idak no líder sira ne'ebé agora iha podér, partisipante sira rekomeda ba JSMP atu organiza fali formasaun sira hanesan ne'e ba iha lideransa hirak ne'e atu bele aprende kona-ba konseitu, valór no qualidade lideransa hirak ne'ebé relevante atu reflète no institucionaliza iha kontestu Timor nian. Partikularmente valór sira kona-ba integridade, onestidade, umilidade, nu'udar elementu esensiál tanba sira avalia katak lideransa sira lakon karakteristiku hirak ne'e iha kontestu polítika atuál. Líder sira kuaze lakon sira nia morál, integridade no la konsistente entre sira ninia liafuan no asaun. Lideransa partidu sira, iha okaziaun antes kaer ukun no depois kaer ukun totalmente diferente.

Partisipante sira mós rekomenda atu formasaun hanesan ne'e bele organiza regularmente atu nune'e permite sira reatualiza no aprofunda sira ninia koñesimentu, hamoris rede parseira atu promove diálogu no komunikan produtivu entre grupu no organizaun partidaria fetu sira, no permite espasu atu knaliza sira ninia perspetiva, preukupasaun, no lamentasaun sira ba ukun-nain sira ne'ebé agora kaer hela podér.

Total partisipantes hamutuk nain 20 ne'ebé maihosi partidu polítiku sira iha asentu parlamentár, no organizaun sosiedade sivil ne'ebé kompostu hosi CNRT nain 4, Fretilin nain 4, PD nain 3, PLP 3, no partisipante sira seluk maihosi organizaun sosiedade sivil sira no estudante Universidadada da Paz ramu RAEOA.

Atu hetan informasaun kompletu favor kontaktu:

Casimiro dos Santos

Diretór Ezekutivu Interinu JSMP

Diresaun e-mail: [casimiro@jsmp.tl](mailto:casimiro@jsmp.tl)

Telefone: (+670) 33238883 | 77257466

Website: <https://jsmp.tl>

[info@jsmp.tl](mailto:info@jsmp.tl)